



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 3

Yangia anidakangma :



Tir Yimiyim



tir_yimiyim




tir yimiyim

TAPAK 8



Myanmar tir tasenba Hlaing anema Indonesia nung ken o benok



Man City captain Silva-i season tembangha sülen club toktsütsü

VOL. XXIII ISSUE NO. 173 (ADOK 173) DIMAPUR SANGTENNÜ (TUESDAY) RONGCHII (APRIL) 07, 2026

₹ 5.00

Reservation Review Commission mapa tenzüker

Dimapur, April 6, 2026 (TYO): Nagaland nung Reservation Review Commission maparen tenzüker osang metetdaksür ta Commissioner & Secretary aser Member Secretary, Reservation Review Commission Mohammed Ali Shihab IAS-i sangdong ka nung ashi.

Iba office ya Social Welfare Directorate, Kohima anasa

Commission Office Complex nung 4th Floor (Top Floor) nung lir ta pai ashi.

Public aser civil society organizations-i Commission nem peii bilemba aser teshinübatem ashitsü akok. Tejangartemi April 24, 2026 matongdang office mapang mesüra email ajanga osang yoktsü akok ta Mohammed-isa metetdaksüogo.

Mar 1 nungi LPG cylinders crore 18 tema agütsüogo

New Delhi, April 6, 2026 (Agencies): West Asia nung tensa mejungi liaka March 1, 2026 nungi tenzüker domestic LPG cylinders crore 18 tema agütsüogo ta Centre-i metetdaksüogo.

National Media Centre nung osangbener den senden ka amendang linük nung totzü aser chiyungtsü peria dang aliba osang ashi.

"Domestic LPG cylinder shita dang agütsüdar aser March 1 nungi cylinders crore 18 tema agütsüogo" ta Ministry of Petroleum and Natural Gas-i ashi.

Strait of Hormuz nung tetsükdaksü liaka domestic LPG supply akhi ama dang ngudar aser agütsüdar ta ketdangsürtemi ashi.

Tim masüba maparen noktangsü atema LPG orders 97% tashi online bookings asür aser cylinder deliveries atema

delivery authentication codes 90% lir.

PSU oil marketing company temi mita aoba maparen lakh 1 tema inyakogo aser idanggi cylinders 52,000 dak tali puogo aser hoarding o black marketing anema mapa akangkanga inyaker.

Public Distribution System (PDS) kübok rice aser wheat shita dang agütsütsü atema buffer stocks peria dang lir ta Centre-isa ashi.

Centre sorkari sensotem dang petsapronga malitsü aser nungdak maliba LPG bookings masütsü mepishia metetdaksüogo. Sorkarisa sensotem dang distributors dangi moi digital platforms ajanga book asütsü shiogo.

Centre-isa nübortem dang energy wazüka yur PNG, induction, aser electric cooktops amala amshitsü ayongzükogo.

Arunachal CM Khandu'er kinunger nem contracts agütsüba CBI-i bushisüngdangtsü

Guwahati, April 6, 2026 (Agencies): Arunachal Pradesh Chief Minister Pema Khandu'er kinungertem nem public works contracts agütsüba atema hopta ana ken o benokang ta Supreme Court-i Central Bureau of Investigation (CBI) nem tetuyuba agütsüogo.

January 1, 2015 aser December 31, 2025 tsüngda Arunachal Pradesh nung public works, contracts aser work orders indang award aser execution bushisüngdang asütsüla ta Justice Vikram Nath-i aniba Bench-i CBI dang shiogo.

"Iba obendang anogo sülen CBI-i hopta ana tsüngda preliminary enquiry ka benoktsüla aser ozüngi melaba ama inyaka aotsü" ta Justice Nath-i ashi.

SC Bench-isa CBI dang hopta 16 tsüngda status report ka agütsütsü tetuyuba agütsüogo.

Iba ken o angadanga arudang tesüba küm ter tsüngda Chief Minister Khandu'er kibong den sendaktepa aliba firm pezü nem Rs 1,270 crore alang government

contracts aser work orders agütsüogo ta okatsürtemi Supreme Court dang ashi.

CM Khandu anema ken o ya NGOs Save Mon Region Federation aser Voluntary Arunachal Sena ajanga benok aser parnok atema senior advocate Prashant Bhushan-i okadak noktaker.

State sorkari agütsüba affidavit ka nung Khandu'er kinungertem indang company tem nem contracts aika lezmüksüba sayua lir ta Prashant Bhushan-isa okadak shia liasü.

Iba public interest litigation (PIL) nung Pema Khandu den Rinchin Drema (taoba Chief Minister Dorjee Khandu kinungsü tanabuba) aser par kinunger Tsering Tashi nunger respondent ama shia lir.

Asür Dorjee Khandu-i 2007 nungi tenzüka Chief Minister inyaka arudang April 2011 nung pa helicopter lendong ka nung tsükset.

Drema'er company Brand Eagles-i government contracts aika nguteta liasü ta PIL nungsa shia lir.

Longkhüm nung candidate ana pusemertem raradang 1 asü

Mokokchung, Rongchii/April 06 (TYO): Mokokchung district kübok 28 Koridang Assembly Constituency nung by-election April 9 nü agütsü aser iba dak sentakba nung April 5 aonung ayatrem nung Longkhüm yimtak BJP candidate Daochier I Imchen aser Independent candidate Major Toshikaba (Retd) phukumer telok ana tsüngda rongrong adok aser nisung 3 kanga mejungi yiru.

Parnok rongnung nung BJP candidate Daochier I Imchen phukumer Imrongsüngba Imchen mozüki bushia Dimapur-i alurba len tom nung süadok aser iba dak sentakba nung Police-i nisung 16 puoka lir.

Iba rongrong adokba sülen Mokokchung District Administration ajanga Longkhüm yimtak Independent candidate Major Toshikaba (Retd) kimen Merentemjen-er kidang lapoker aliba aser BJP candidate Daochier I Imchen kimen Kilangzülu-er kidang lapoker aliba shibangtsüogo.

Mokokchung Deputy Commissioner Ajit Kumar Verma IAS ajanga Longkhüm, Mangmetong aser 2nd NAP Camp densema Alichen nung aonung 6:00 ako nungi anepdang 5:00 ako tashi Night Curfew alitsü ozüng agütsüogo.

Ano, Koridang nungsa Mangmetong yimtak April 6 anepdang BJP candidate

Daochier I Imchen teloki Independent candidate Imchatoba phukumer ki amak aser gari 12 raksatsü.

Iba tatalokba dak ajemdaker Imchatoba teloki Police Station-2 nung FIR lodge süa lir. Kasa tatalokba sülen Mangmetong yimtak Mokokchung Police-i injang aser prangpong ishika bena arua lir.

Deputy CM Patton-i nisung tepsetba aitsür

Dimapur, April 6, 2026 (TYO): Longkhüm nung election dak sendakba nung mangatetep adoka raradang nisung taküm laluba khukhua aitsür ta Deputy Chief Minister Y. Patton-i metetdaksüogo.

Iba tatalokba nung Imrongsüngba Imchen taküm samaba atema temulung raksar aser par kibong den asükhu lemsateper. Maneni iba lendong nung yirua alirtem tekaraba nung taneptsü angütsü sarasademtsür ta Patton-i ashi.

Elections nung ozüng alema inyaksangshi masütsüla aser

nübortem temulungtetba sayuba sabang ka sädaksütsüla. Elections ya tetsübu, tejashi mesüra telemsa adokdak mekümdaksütsüla. Ibala tatalokba ajanga nübortemi election maparen nung temulung malemer aser telok balala tsüngda telongjem tangatetba raksatsür ta paisa metetdaksü.

Koridang constituency nung political party balala nungi senso ajak süngjema aser aremzüktepa alitsü ayongzük. Iba by-election ya tiptema aser süngjem agütsüsa ajaki yariteptsü mepishir ta Patton-isa ashi.

CEC Gyanesh Kumar anema benokba impeachment motion magizük

New Delhi, April 6, 2026 (Agencies): Chief Election Commissioner Gyanesh Kumar mapa nungi agientsü atema impeachment motion ka Rajya Sabha Chairman aser Lok Sabha Speaker naprongi magizük.

Iba motion ya March 12, 2026 nü Rajya Sabha züngsem 63 aser Lok Sabha MP 130-i sign sür agüja liasü. Tang mezüng atema Opposition-i Lok Sabha aser Rajya Sabha naprong nung Chief Election Commissioner (CEC) mapa nungi anentsütsü atema notices benoka liasü.

Gyanesh Kumar-i külen tsütsü shir inyaksangshir, tim masüba inyaker, election nung ashikülak mapa bushisüngdangba nung tetsükdaksü agütsür aser voters aika endoker ta

Opposition-i benokba motion nung shia lir.

Bihar nung electoral rolls indang Special Intensive Revision (SIR) tim mesüi inyak aser iba ajanga voters aika tenüng agienogo ta Opposition-isa shia lir.

CEC Gyanesh Kumar-i political party kar pusema inyaker ta parnokisa tai tongloktsür.

Ajisüaka Rajya Sabha Chairman-i ken o ajak jungjunga asadanga sülen Chief Election Commissioner anema impeachment motion benokba magizük.

Maneni, Lok Sabha Speaker Om Birla-ia Opposition indang notice magizük. Lok Sabha Speaker-i Judges (Inquiry) Act, 1968 kübok pa nem agüja aliba tashi amshia iba lemtet agiogo.

Opposition-i CEC Gyanesh Kumar mapa nungi anentsütsü akhang saka Parliament nung presiding officers anaprongi iba ken o magizükba ajanga Chief Election Commissioner anema benokba impeachment motion mali ama akümer.

Rajya Sabha Chairman C.P. Radhakrishnan aser Lok Sabha Speaker Om Birla nati lemtet agiba osangtem ya pei pei Parliamentary Bulletins ajanga Hombar aonung metetdaksüogo.

"Rajya Sabha MP temi CEC Vanish Kumar agientsü notice agütsüba magizük. Kechi atema magizük kuli magütsür. BJP-i asen Parliament mezüngmeshiba manener" ta TMC MP Derek O'Brien-i X nung metetdaksüogo.

INC candidate Chalukumba atema Longkhüm aser Alichen nung nübu yimtsü

Mokokchung, 6th April (TYO): 28-Koridang A/C by-election koba 9th April, 2026 nü lir, iba nung tokteptsü alisang Indian National Congress candidate T. Chalukumba Ao atema Longkhüm aser Alichen nung sentong balala ayonga nübu yimja jajaogo.

Nübuyim sentong balala nung Nagaland Lok Sabha MP & NPCC Tir, S. Supongmeren Jamir den Odisha nungi Congress MP & Nagaland In-charge, Saptagiri Sankar Ulaka; Manipur CLP Leader,

Meghachandra Singh; Odisha nungi taoba Minister aser Congress lenir, Jaydev Jena; taoba MP/MLA & NPCC Working President, C. Apok Jamir; Mokokchung DCC Working President, I. Tamsu Jamir aser ano Congress lenir aika densema shilem agia liasü.

Item tesem balala sema jajadang, constituency terenlok asoshi koba LADP arur, itemji timi ketdangsüa Koridang lirumedema renloktsü asoshi amshitsü, ta INC candidate Chalukumba-i metetdaksü.

Nüburi dang maongka agütsüra, Koridang sanger asoshi maparen ajak meranga jembia inyaktsü, ta nangzüka pa nem yimli agütsütsü mepishia metetdaksü.

Election petsaperong kecha mekai timi aser tesünep (free and fair) agiba nung amanger, anungji, yimtsüng ajak nung tashiyim mapa kecha medeni nüburtemi pei vote pei-i mulungba candidate nem ajentetsüsa yimdeni lenmang satemsatema lapoktsütsüla, ta paisa mepishia metetdaksü.

(Maneni tapak 2 nung...)

Dimapur nung ENSF asoshi Community First Responders Training agütsür



Central Training Institute (CTI), Home Guards, Civil Defence & SDRF, Toluvi, Dimapur nung ENSF atema Community First Responders Training agidang tangokba noksa ka yangi angur.

Dimapur, Rongchii/April 06 (TYO): Community First Responders Training sentong ka Eastern Nagaland Students' Federation (ENSF) züngsemtem asoshi April 6, 2026 nü Central Training Institute (CTI), Home Guards, Civil Defence & SDRF, Toluvi, Dimapur nung tenzükba liasiü.

Anogo pongu training sentong nungya tebur 81 aser tetsür 23, ajak agi training agir 104 shilem agitar.

Iba training tenzükba sentong nung District Commandant, Dimapur. M. Yingnyi Konyak menden liasü aser ajungben lendong timtem mapang trained first responders shilem aser nüburttem renemshia alitsüba indang jembia.

Pai training agirtem dang temulung agüja shilem agitsü aser lendong timtem mapang tajungtiba nung yariteptsü asoshi renemshia alitsü ayongzük aser tasü tait, temulungtetba aser bendanga agütsüba ajanga responders tajung akumer ta ashi.

Commandant, CTI, HG, CD & SDRF, Avinuo ajanga tayongzükba o jembidang iba

training ayongzükba nükjidong lemsatep aser shilem agir nem nüngdakba skills aser shisatsü agütsütsü aser ajungben lendong timtem mapang tajungtiba nung yariteptsü ta ashi.

Lai training agir ajunga pelashishia agizük aser disaster management ya duty ka kisung nasü saka meimchir tenzükba mapa ka lir ta ashi.

Lendong timtem mapang telangzüba agütsüba aser renemshia aliba nung ranglokba training institute Department of Home Guards & Civil Defence kübok Central Training Institute ya kisung lir aser yangi kija, lokti tentet aser kin balala nem training agütsür, ta lai ashi.

State Disaster Management Authority den lungjemer parnoki Aapda Mitra Scheme kübok community first responders 1,000 shi training agütsüo aser NSS, NYKS aser Bharat Scouts and Guides nungi volunteers 700 jungnüa nem training agütsüo ta Avinuo-i ashi.

Iba training nung shilem agirtem first aid, road rescue, water rescue, firefighting, search and rescue aser overall disaster preparedness indang

sayutsü, ta lai ashi.

Lai training agirtem dang yimya shidak amshitsü, temulung agüja anogo pongu training nung adentsü ayongzükba liasü.

Secretary, NSDMA, Sentiwapang Aier-i sentong nung jembidang, mapang shidak nung tongtipang training agütsür ta ashi. Alimar lendong timtem ya ajungbena ataloker aser ano meta talang nung emergency services peria malidak tesashiba kongshir ta ashi.

Iba ama tensa nung nüburttem aser talisa lanirtem first line of response ama lir ta pai ashi aser training shidak agia metetba aser renemba ajanga nisung takum kumzüktsü, lendong tajemba kumdaktsütsü aser professional responders marudang teraksa tajemba kuma azüoktetsü ta ashi. Iba training nükjidong ya practical skills agütsüba kisung masü saka shilem agirtem nem khuret angatetdaktsütsü, lenir ama aser renema lidaktsütsü asoshi lir ta pai ashi.

Iba sentong nung ENSF tatong tir Pusho P-ia o tatsüka jembia sentong ayonger dang pelaba lemsatepa liasü.

SCAPP Award atema nominations meshir

Dimapur, Rongchii/April 06 (TYO): National Disaster Management Authority/ NDM Bhawan, New Delhi ajanga Subhash Chandra Bose Aapda Prabandhan Puraskar (SCAPP) Award atema nominations meshir, koba disaster management nung shilem tajung agiba asoshi küm shia agütsüba tetushi lir.

Iba dak sendakba nung Deputy Commissioner, Kohima, B. Henok Buchem, NCS-i sangdong ka nung nominations

agütsütsü ayongzükba liasü.

Disaster management dak sendakba prevention, mitigation, preparedness, response, relief, rehabilitation, research, innovation, aser capacity building nung alakteta shilem agiba atema iba sempet ya agütsür.

Iba sempet ya categories ana kübok agütsür - Individual Award, koba scroll ka den medal aser Institution Award nung scroll aser plaque agütsür.

Kija, institution aser national aser state level bodies, district

authorities, research and academic institutions, NGOs aser civil society organisation amala aser private sector organisations temi nomination agütsütetsü, ta ashi.

Nominations ya küm tepiyong agütsütetsü aser candidates temi pei sasa nominate asütsü akok mesüra third party ajanga nominate sütetsü. Application ya National Awards Portal ajanga awards.gov.in nung agütsütsü koka lir ta ashi.

INC candidate Chalukumba atema Longkhüm... (TAPAK 1 NUNGI...)

Democracy benshiba yimsüsüba ka nung opposition indang shilemji kanga tongtibang lir, saka opposition melira sarkari tim mesüi inyakba mapa anema ola madoktetsü aser pei sünütsü asütsü, Nagaland nunga sarkarji opposition mali odar, anungji, opposition ola südaktsütsü asoshi Koridang nüburttemi INC candidate Chalukumba nem maongka agütsüdaktsünür, ta Odisha MP & Nagaland Incharge, Saptagiri Sankar Ulaka-i jembidang metetdaktsü.

Nagaland ya Christian state ka ta angazük aser saka yangi tonga arudang, BJP flag aika songa ngur kanga süngmanga bilemogo, kechiyong BJP yagi nütsüng ishika dang aliba nüburttem akoksatsüsa mapa

balala inyaker, ta pai ashi.

Chalukumba ya tang agi election-i pezüben aiba tetezü pa dak nüburttem tenzükünba tanela ajiteter, ta Lok Sabha MP S. Supongmereni ashi. Congress candidate dak alaka tanünga candidate ajak adokra ruling sarkar nung adentsü tangatetba lir, anungji, parnokji adokra küm ka sür tesadang kaji tangari kechi shidir hai ta anitaktsü nüburttem dang lir, saka kodang Congress candidate adokdir paji assembly nung nüburttem ola sütetsü, anungji, Congress nem yimli agütsütsü asoshi paisa mepishia metetdaktsü.

Nagaland koloni yoknür ta asübaji Koridang-i telemtetba tulu ka agütsütsü aser Naga nung nem tetuyuba ka sayutsü ta bilemer, aji oda, Naga nung

rongnung Ao kin ya mezünpur ta tangari züngshir, anungji, kanga shisadanger INC candidate nem vote agütsütsü asoshi mepishir, ta taoba MP & MLAC. Apok Jamir-i ayongzük. Naga yimden tebilemetsü atemer kümsük ana tashi party-less sarkar yanglur arudar, saka Naga yimden terenlokba kecha mangur, ta paisa shisem.

Democracy yimsü nung opposition malibaji nüburttem atema takoksa tulu, opposition ji tongtibang kechiyong iba ajanga sarkar inyakyim aser maparen miteter (check & balance), anungji, Koridang nüburttem ya temelenshi bener arur ka akümtsü asoshi INC candidate shimtsü mepishir, ta Manipur CLP Leader, Meghachandra Singh-i ayongzük.

Mejangjaba nisung tasü mang ka nguteta lir

Dimapur, Rongchii/April 06 (TYO): St. John Higher Secondary School Dimapur anasa Rilan Village nung gari lendong ka ajuru ta Police Control Room Dimapur nungi April 5, 2026 nikongdang 7:30 ako meta tezüluba nung osang ka aru.

Iba osang nung ajemdaker duty nung alirtem iba lendong atalokba tesem bushia ao aser mejangjaba nisung (tebur, non-local) ka auto rickshaw B/Regd No. NL07F9492 agi menünger tekolak yirua Faith Hospital nung süa liasü, ta Dimapur Police sangdong ka ajanga ashi.

Iba nisungba jangjatsü asoshi kanga merang, saka

mejangjatet. Nisungba ya arishi küm 35-40 tsüngta aser tar 5'6 ft shi aser pangsemo keta lir ta ashi.

Ozüng agi melaba maparen ajunga inyakba sülen tasü mang ya jangjatsü atema District Hospital Dimapur Morgue nung bener oa lir.

Nisungba ya long pant sentüsü tanak, long shirt sentüsü tanak, teka achichilen bangle inoka lira ser teka achichi temeyong tiyongtsüba nung angoti inoka lir.

Kibur/kinunger/tembar temi Officer-in-Charge, Diphupar Police Station Chumoukedima, den Mobile No. 7085055024 ajanga tongteprateptsü mepishir, ta sangdong ajangasa ashi.

Longleng nung Youth Cultural Fest ayongzük

Dimapur, Rongchii/April 06 (TYO): Longleng Town Students Union ajanga "Know Thy Roots" omen kübok 2 buba Youth Cultural Fest sentong April 2, 2026 nü Public Ground, Longleng nung ayongzükba lanurtemi sobaliba aser telungjem benjonga liasü.

Iba sentong nung Longleng town wards 11 nungi lanurtemi sobaliba tsüngsang, tar nung otsü, washitepba, shi temu achiba aser ano yimya balala nung toktepa liasü.

Sentong tenzükba Yongnyah Hongnyü Union, Longleng ajanga süngkong ajena liasü.

Sentong akhumdong Imkongnukla Ao, EAC ajanga skill development sentong nung temulung agütsütsü indang jembia liasü. Lai lanurtem dang maongka ajak amshitsü aser mapa nung ajemalua inyaktsü ayongzük.

Lai lanurtem dang meranga inyaktsü, yimya tajung amshitsü aser maneni aintsü asoshi inyaktsü ajungshi aser pei sobaliba nung tera yanga alitsü ajungmesoa liasü.

Lai iba benjongmung ya sobaliba wazüka ayutsü aser

awareness asoshi tongtipang sapang ka lir ta ashi aser telungjem nung alitsü aser pei oshi ajungkettsü, kin telemsa madokdaksütsü ayongzükba liasü.

12th Assam Rifles 'The Daredevils' nungi Major Shubham Pakhare-i iba sentong shibangtsü ama shilem agia lanurtem dang yimya tajung amshitsü, telungjem nung alitsü aser maparen balala nung bendanga agütsütsü ajungmesoa liasü.

Iba sentong nung lanurtemi tejangraba tulu nung shilem agiba ajanga pei sobaliba wazüka ayuba nung temulung agütsüba sayua liasü. Iba sentong ya sempet sayuba sapang ka kisung masü saka sobaliba, telungjem aser kin tanüla akangshiba mapang ka ama liasü.

Sentong ayonger aser shilem agirtem dang tongtipang nisung temi tenüngsang agütsü aser tarutsü anogotem nunga pei sobaliba wazüka ayutsü aser amshitsü ajungmesoa liasü.

Iba benjong nung overall champion ya Shamkang ward liasü.

BJP Nagaland state pur 47 buba Foundation Day amung



Dimapur, Rongchii/April 06 (TYO): Tanü Bharatiya Janata Party, Nagaland State pur 47 buba Foundation Day state tesem balala nung munga liasü.

Iba anogomung nung BJP Nagaland tir Benjamin Yephthomi-i karyakartas aser Nagaland nung aliba nüburttem dangi salem bena liasü. Pai Foundation Day ya tejak tentetba aser tesüba mapang bilemtetba mapang ka lir, aser alima nung political party tulutiba ama linük meimtsü, junga yimsü asütsü aser bendanga agütsür nüburttem tangatetba sayur ta ashi.

Party workers temi bendanga agütsür anibelem mesasai inyakba ajanga jenjang balala nung party tashi itshir ta pai tenüngsang agütsü aser BJP-i terenlok aser telungjem adokdaksür aser Nagaland nung nüburttem ajunga ajangzüktsü aser terenlok alitsü asoshi inyaktsü temulungtetba nung tanü party nokdaka lir ta ashi.

Yephthomi-i karyakartas ajunga dang nüburttem tenzükba, telungjem aser arok terenlok nung bendanga agütsüshitsü aser saksalema Nagaland tashi taitba aser yimchiyimjung asoshi inyaktsü ayongzükba liasü.



April 06, 2026 nü Thanjavur nung Tamil Nadu Deputy Chief Minister, Udhayanidhi Stalin-i party candidate, Durai Chandrasekaran atema nübo yimsüdüng tangokba noksa nung angur. Durai-i Tiruvaiyaru Assembly constituency nungi tokteptsü.

BJP Foundation Day nü PM Modi-i party nung inyakertem tushi

New Delhi, Rongchii/April 06 (Agencies): Hombarnü BJP Foundation Day anogomong nung Ato kilonser, Narendra Modi-i party nung inyakertem nem tenüngsang agütsü aser party-i maneni terenlok mapa inyaksü, ta metetdaksü.

X ajanga Ato kilonser Modi-i, party-i "India Tama" tangatetba nung inyaker aser loktiliba tenzüka tsütsülen party tejaklen lir, ta metetdaksü.

Paisa BJP nung inyakertemi pei atema mebilemi nübur junga tenzüka atema tenüngsang agütsüba den külemi party aintsü atema kanga nendaka inyaka arurtem aser aremzüka inyakertem bilemteta tenüngsang agütsü.

"Party Foundation Day anogomong nung linük tesem ajaklen BJP Karyakartas nem

tenüngsang agütsü. Lokti tenzüka nung asen party ya teti tejaklen lir aser ibaji India Tama tangatetba nung inyaker. Asen party nung inyakertemi pei atema mebilemi tenzüker, nendaka inyaker aser yimsüsüba tajung asütsü atema nendaka inyaker. Akokba tashi nisung teimtiba asen tangatetba aser mapa den sendakteptsütsü atema parnoki 'grassroot' level nungi anibelem aremzüka inyaker. Iba dak alia tesüiba küm aika tsüngda party aintsü atema kanga nendaka inyaka arurtem, tenla agütsürtem aser aremzüka inyakertem-a bilemteter," ta pai ashi.

"Nüburtem tiyongtsü südaktsüba mangdang yur inyakba party ji BJP lir. Iba ya Centre aser state balala nung aseni inyakba mapatem ajanga

sayur. Terenlok India yangertsü atema BJP-i inyaker. Asenoki maneni longjemer iba mangdang tejakleni bener odi aser India ya terenlok aser azükaru tsütsü temaba jenjang kati anidi," ta paisa metetdaksü.

Union home minister Amit Shah-i, BJP tentetba ya yimtenren terenlok ka dang masü saka linük yanglutsü atema tenangzüka ka lir, aser iba ya Shyama Prasad Mukherjee aser Deendayal Upadhyay nungeri ajungmesoba liasü, ta metetdaksü.

Iba anogomong nung Union ministers- Kiren Rijju aser Nitin Gadkari nungeria BJP ya tongti yimtenren party ka akümba atema party nung inyakertem nem tenüngsang agütsü.

Janata Party den pilaba sülen 1980 küm BJP tenteta liasü.

India tesem ajaklen police stations nung CCTV inoktsü SC-i tuyur

New Delhi, April 06 (Agencies): India tesem ajaklen police stations nung CCTV inoktsü, aser iba maparen nung yaritepktsü asoshi jembishinütsü atema Supreme Court-i Union home secretary dang Mongolbarnü court matsüngdangi arung, ta tuyu.

Police station aika nung CCTV junga maliba dak sendakba ken o ka angadanga mapang nung Justices- Vikram Nath aser Sandeep Mehta nati akümba bench-i iba tetuyuba agütsü.

Hombarnü iba ken o angadanga mapang nung bench-i Centre tenüng nung ken o jembir counsel dang, tawa China nung company kati

yangluba CCTV camera nung security dak sendakba timtem lir ta shia CCTV aika agienba kuli asüngdanga liasü.

Justice Mehta-i, sorkari China nungeri yangluba CCTV ji agientsü tuyu, kechiyong item CCTV jagi data bendena China nungeri dangi yoker, ta osangkakettem nung adok, ta ashi.

Centre tenüng nung ken o jembir Additional Solicitor General Raja Thakare-i, iba dak sendakba nung official süa tetuyuba kecha magütsü, ta metetdakja liasü.


Taküm February 26 nü Supreme Court-i Centre sorkar dang police stations nung CCTV infrastructure

ajungkettsütsü tuyua liasü.

2018 küm nunga SC-i police station nung meimchir temeden anema inyakba aser tashiyim mapatem nokdangtsü atema police stations ajak nung CCTV cameras inoktsü tuyua liasü.

2020 küm December ita nunga SC-i Centre dang CBI, ED aser National Investigation Agency (NIA) office ajak nung CCTV cameras aser recording asüba osettem inoktsü tuyua liasü.

Iba mapang nungji SC-i states aser Union Territories ajaki police station ajak nung kikümbang, tongti kikümbang, lock-ups, corridors, lobby aser reception ajak nung CCTV camera ayutsü tetuyuba agüja liasü.



April 06, 2026 nü Jammu & Kashmir kübok Ramban nung tzünglu kanga aruba sülen anentsüh tulu alua alidak nisung adenshia aliba noksa nung angur. Anentsüh aluba sülen Jammu-Srinagar national highway nokdangogo.

AOYIM SENSO MUNG DANG CHUMOUKEDIMA

11th April 2026 anogo nung Aoyim senso mungdang alitsu. Iba anogo nü Aoyim nung ali akar ajak, tebur kumsuk kum 18 nungi tema ajak pei kin subotsü subor metema arutsu Senso Menden ajanga metetdaksur. Mapang 10 AM nungi, tesentepdak Aoyim Tatar Salang. Agenda kar lira ketdangpur ket 8th April 2026 tashi nung tongtsutsu metetdaksur.

- Iba anogo nü saru sarutsü
(a) Senso zungsem saru kum 18 nungi tama ajak Rs. 200
(b) Kilen saru
1) Ali akar Aoyim nung alir Rs. 500
2) Ali akar Aoyim nung malir Rs. 1000

Sd/- President

Sd/- Secretary

NCP lenir ka tepsetba atema Amit Jogi taküm piyong tepuokdak ayutsü

New Delhi, April 06

(Agencies): 2003 küm NCP lenir, Ramavatrar Jaggi tepsetba ken o dak sendakba nung taoba mapang Chhattisgarh chief minister, Ajit Jogi'er jabaso, Amit Jogi taküm piyong tepuokdak ayutsü obendang agütsüogo.

Chhattisgarh High Court-i temerenshi obendangji agüja liasü.

2007 küm trail court kati iba ken o nung Amit Jogi maitsüi chioka liasü, ajisüaka Chief Justice Ramesh Sinha aser Justice Arvind Kumar Verma nati akümba bench-i ibaji obendangji agientsü.

"Trial court nung judge-i tai tonglokja alisang Amit maitsübaaji ozüng alema lir, aibelen aser kuli den meputep ta onoki asadangtetogo," ta High Court-i metetdaksü.

2007 küm May 31 nü trial court kati iba ken o nung Amit Jogi maitsüi liasü.

Hombarnü High Court-i, Amit Jogi aitsüogo aser IPC kübok Section 302 aser Section 120-B nung ajemdaker pa nem temerenshi agütsütsüa lir; pa taküm piyong tepuokdak ayutsü, ta metetdaksü.

High Court-isa pa dang

senchi 1,000 achi, aser pai senchiji magütsüra pa ano iba trok tali tepuokdak ayutsü.

Nationalist Congress Party (NCP) lenir, Jaggi ya 2003 küm June 4 nü tepseta liasü. Iba mapang nungji Amit Jogi tebu, Ajit Jogi Chhattisgarh chief minister liasü.

Iba ken o ya mezüngbo state police-i bushisüngdang, iba sülen Central Bureau of Investigation (CBI) nem agütsü. CBI-i iba ken o dak sendakba nung Amit Jogi desema nisung aika anema ken o benoka liasü.

2007 küm May 31 nü Raipur nung aliba trial court kati tai tonglokja alir 28 anema kuli lir, ta metetdaksü, ajisüaka Amit Jogi bo maitsüi liasü.

Amit maitsüba anema CBI-i ken o agütsü, ajisüaka kanga menor ken o benokba ajanga 2011 küm High Court-i iba ken oji magizüki liasü.

Yaküm November ita nung SC-i Chhattisgarh High Court dang CBI temepishibaji agizükang aser Amit Jogi chikba anema temepishiba ken o benokbaji agizükang, ta tuyua liasü.

Ajioda taoba ita High Court-i asentenshir iba ken o angadang tenzüka liasü.

Congress-i Puducherry UT nem state jenjang agütsütsü: Rahul Gandhi

New Delhi, April 06

(Agencies): Hombarnü Congress MP aser Lok Sabha nung opposition lenir, Rahul Gandhi-i, Puducherry nung Congress party-i takok ngura agütsütsü, ta metetdaksü.

Lawspet nung election nüboyim sentong ka nung jembidang pai, "Onoki Puducherry nem state jenjang agütsütsü," ta metetdaksü.

Rahul Gandhi-i, tang Union Territory nung aliba sorkari nüburtemi melungba ama meinyaker, ajisüaka Delhi nungi tetuyuba nung ajemdaker inyaker, ta ashi.

Paisa, BJP-i regional lenirtem sendoker aser Delhi nungi remote control amshia Puducherry yimsüsür, ta metetdaksü.

"Contract mapa ajak nung commission shilem 30 agir, ta ajaki meteta dang lir. Yangi sorkar ya sen bendenba agent

ka kümogo. Puducherry nung aliba sorkari nüburtemi melungba ama meinyaker saka Delhi tetuyuba kübok inyaker," ta pai metetdaksü.

"Congress teloktep sorkari Puducherry atema kechi inyaksütsü? Onoki ita shia mapa manguba lanurtem nem sen 2,000 teyari agütsütsü, public aser private sectors nung mapa tasen 30,000 adokdaksütsü, Puducherry nung aliba bus tem nung tetsürtem angati senzüdaksütsü. Sorkar mapai aitsü atema arrshi küm 40 tashi ajungkettsütsü. Puducherry nung kibong shia nem sen lakh 20 jenjang healthcare insurance agütsütsü," ta pai metetdaksü.

Rahul Gandhi-i voters dang Congress aser teloktep nung aliba candidate tem nem vote agüjang, ta mepishi.

Puducherry nung assembly election April 9 nü agitsü aser May 4 nü vote azüngtsü.



TIR YIMYIM YIMOBILEM (EDITORIAL)

DIMAPUR TUESDAY, APRIL (RONGCHII) 07, 2026

Kanga sasar!

Tang Koridang Assembly Constituency nung by-election agitsü lia nisung taküm dena aotsüsa atalokba lendong osang angashia kanga sasar. Iba takoksa ya Koridang nung kija masü saka Aotsür Aor ajak asohi takoksa aser Aotsür Aor ajak asoshi tejashitsüka aser alima tsüngdang asenok ajak tamakok dang masü saka maksü tulu ajuruogo. Atangji, election agir asünungji kabosa adoktsü saka iba takokjia tamakok dang nungi tamakokba aser takoksaba kümdaktsüogo. Aji oda, tang dang masü saka taoba mapangtem nunga asenok Ao lima tesem aika nung election mapang lendongtsüdong tulu aika atalokogo aser item lendong agi asenok nisung taküm dena samatsüsa takoksa ajurubaji MLA meyirijanga akümyonga iba jagi memenoktetsü. Item tatalokbatemji bilemdang dang, kechiba asenokbo nisung tepseta yur MLA kümner (?) ta kanga jashia bilemer. Aji oda, taoba mapangtem nung arogo aser lokti tentetemi anir asen lima nung Election timi agitsü asoshi tangatetba tajung agüja jajaakasa, election mapang tonga arudangbo tang Koridang nung atalokba amaji ataloker, ibaji mangatetba agi masü saka angateter mangatet kümer inyakba ajanga asenok akoksar aser alima tsüngdang asen kin maksü ajurudaktsür, kechiyong tangar tsüngdangbo asenokji asen yim, asen tzükong aser asen constituency-ji masü saka asenok ya Aotsür aser Aor lir. Atangji, Koridang nungbo par yimer, ozü yimer, ozü party, par party ta tetshia alitsüa akok saka asen lima ajangerbo tangaribo asenok ajak ya Aotsür Aor ta dang jembir. Aji oda, taoba election nung tamajung atalokbatem toa ozü yimtak mesüra nür yimta atalok masü saka Ao lima nung atalok, anungji tangari nür yimerbo mesüra par party purbo ta masü saka nenok Aorbo ta sasaja aser luja jembir. Iba amaji mejembidaktsünüba agi aser tang Longkhum yimtak ataloba amaji mataloktsünüba agi, Koridang nung by-election agitsü anogo sangdongli nungi tangar ajaki tatishitsü tajung agitsüsa election timi agitsü asoshi iba yimobilem nunga tazüngerem den aiben shisa lemsatepogo. Aji oda, Ao Sendenia Koridang nung yimten yimsüsür aser lenirtem jaoka election timi agitsü asoshi ajungshitepogo aser ABAM-ia akhi ama candidate ajak jaoka sarasademtsüogo. Atangji, ABAM aser Ao Senden mapabo yangji atemer, kechiyong parnoki Koridang tashiji iagi election matem tashi nüka melitetsü aser Election inyakyim agia memelar. Ajisüaka, yimten aser lokti lenirtemi election timi agidaktsünüa ajungshibaji aser arogoi sarasademtsübaji tashi angaa mapa küma inyaktsübajibo election nung vote agütsütsü pur nübortem mapa lir. Asenoki aiben election timi magitetba ya arogo aser lokti tentettem dak atonger, saka arogo aser lokti tentettem shirnoki 'Clean election' atema jembia senzür, ibaji parnok ajangzüksü asoshi masü saka election nung vote agütsütsü purtem ajangzüksütsü asoshi khuret bena inyakerem lir. Aji oda, aseni asen vote ayokbaji mesüra aseni tangar vote alibaji, mesüra asenoki tashiyim amshia tangar dak tamajung inyakbaji kodaser ABAM aser Ao Sendeni nokdangtetsü? Kodaser asenoki angateter ser nung mangatet kümer sen agi aser yi agi meseper mapa tamajung inyakbaji Clean election indang jembia jajartemi nokdangtetsü? Itemji tangatetba agütsütsü purtemi tangatetba agütsürbo, mapa küma inyaktsübajibo pei dak keta lir. Atangji, Democracy ya nisung tepseta yur MLA akümba election dang majar mesüra sen agi vote alia election nung toktepba danga majar. Democracy ya yimten nung shinga meyrutsü aser shinga temetena merakzüi pei temeten amshia yimten yimsüsür shimba aser yimten nung marendaki shilem agiba dang ajar. Joko, asenoka nisung tepseta election agiba mapa yabo anentsüla aser nisung tepseta yur mesüra nisung ishikabo mozü kidang yur election agia adoktsü agibo election nung madokang aremtsüla. Atangji, election nung makok aremba aser asenoki memelungaka teimbai mulungba nung anidakba dang Democracy ta ajar. Ibaji angateta election nung candidate-ia aser voter-temia shilem agitsüla.

OLEMSABANG

TEMBAR ANA OTSÜ

- K. Moatoshi

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Tesasatsüka konangba onsara meteta ashiba agi kinunger aser yimtak tantsü tambo tem shingai-a pa sayupentsür aser metongshitsür mali asü. Arogo yimten ajak pa tekapu nung amer pa moazü moazü-a dang lia aru. Pa tashi tawar, ken shi o shir asü nung temeket yimtsüngtem dang masü tangar kintem tena pa dangi ken o aser otsü olem asündangi sa aru. Kidang kibok kisemer masemer, kenken bo kibok kisemer kidang longsoa toktsür sa par po mejang. Konangbai tanürtem nem mapang magatsütet, tanürtem sayupentsütsü mapang mali. Kapok tekülem agitsü jipo pongmang, lokti palala teyar meshei-arur jenti, yimer sensaker alu yimertem par tang dang tsüktem agia chiyonger.

Iba amaji anogo shia rali wa lir yimlu surtem ajak par-i mesua anu atok aben benjong amai dang watitepba meren merena lia aru. Arogo nungertema Yisu asoba benjong aser küm tasen benjong chiyongdaktsütsü shisa mepului konangpari dang arogo khuret tongzüka pari aiben chiyongdaktsüa yimtak yimpok sur sua kibur küma jangratema lia aru. Aremzüksang jabaso ana jala ana Tsüngremi moatsü, pa kanga tongmelang ochishir aser meranga inyakba Tsüngrem tsübuba tebu ka liasü. Pa tembar konangba ama ba ken shi-o-shir masü nung Arogo nung dang mapangser inyaka aru. Pai ochi shia tilatiba kümer nupur ajak tenzük nung Tsüngremi pa tali moatsü. Pa tembar konangbar benjong mapang par anuk apang tem mazüng dang pai teimba ka maparen ajak nung yaritep. Par tanürtem ajak yimtak sorkar school nung dang züngdaktsü. Saka par jabaso anati class ter tatidang nung ajak dang temaba jenjang nung takok konang pener arutsü. Par ali rongsen nung sensaker liaka tanela nung takar liasü. Tsüngrem metetba aser tazüokba nung ochi shia meranga inyakba asüngteta aliba kibong liasü. Aonung shia kibok tekelem akar aser tanürtem dang sayupentsü akaba khristan kibong tajung ka. Mepu nung aonung shia par kibok tekülem agidang lai zünga ken atenba sarasademba ola agi kiyonger ajak lemla lemla liasü. Kiyonger kija alir sangremer, amitsür, milatsür-tema tejangrartembo par kibok tekelem agiba nung arua shilem sa agia aru. Tanürtem yimdong nung senzürtemi par tekülem agiba mapang kibok sa asen. Kodang Aremzüksanger jabaso anati class ter tatidang nung takok tulu anguba osang Konangbai angashi pai par tembar yaritsü melena mokokachitsü tenzük. Saul chubai David dak tenuk meremba ama, konangbai par tembar Aremzüksang tang sembatsü tenzük. Tembar ana tsüngta temeneni mapa inyaktsü tenzük. Pai pa tembar sensak sangji yaritsü melen senpak ka danga taputsü-a maputsü. Aremzüksang kijasar teyarir shinga mali, tembar tajung ka ali nung iba jaki-a sendok saka pai

Tsüngrem dak dang jenok aser meranga inyak. Tanürtem ajak tazünger dang rongsen maka, anungji pa bendang balala leni ayangi sen bushia ao, aiben bendang lima arem nung ayang dang rongjena kisung ayang semtu nung kinungtsü aser chirnurtem menungra temulong raksa "ozü sensaker bo temeimer mali" ta ken tena sa kazü. Aremzüksang-i ochi shia meranga asentsü sena inyaka aaba rongsen agi par tanürtem zünga mesutet. Mapang mapang shia ayang len nungi yimtaki arudang par medemsang konangbai yimten aser Arogo lokti balala senden nung pai tangar makok mesura pa tebilemba matalok aru dang Aremzüksang dak arua meitsünema sa merenshia mezüngmeshi. Tsüngrem o nung ashiba ama "ajemalur temi alimasenmang amangtsü".

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

South Korea yimtiba, Seoul nung '2026 Easter Parade' agi



South Korea yimtiba, Seoul nung "2026 Easter Parade" nung shilem agirtem kar noksa nung angur.

April 06, 2026: April 04, 2026 nü South Korea yimtiba, Seoul nung aliba Gwanghwamun Square nung nisung 8,000 dak tali adenshia "2026 Easter Parade" nung shilem agiogo.

Yisu Khrista tasü nungi shia aruba aser Korea nung Arogo puti otsü sangdonga parnoki iba sentong nung shilem agia yimdong süa jaja.

Iba sentong ya United Christian Churches of Korea (UCCK), CTS Christian TV (CTS), CTS Cultural Foundation aser Joy & Com Co.-i longjemer ayongzüka liasü.

"Pa taküm lir, anungji asenoki asüng atema metsübur! Taküm aliba Kibuba, atangji ni asoshi chichiba teimla" omen nung ajemdaker iba sentong agi.

Iba sentong nung team 40-i Gwanghwamun Square nungi Sejong-daero tashi nung shilem agi. Iba sentong nung jilushi shilem pezü lemsar agi, aser itemji - Tenangzüka tetenzük, Timtemba aser shia aruba, Korean Peninsula & Khrista osangtajung aser Tarutsü atema tenangzüka liasü.

Iba sentong tenzüka Ilsan Kwanglim Church nung pastor aser Easter Parade organizing committee chair, Rev. Park Dong-chan-i sarasadema liasü.

United Christian Churches of Korea Tir, Rev. Kim Jung-seok-i, "Korean Arogoi temeim nung longjemer alima kintem dangi oa Yisu Khrista tasü nungi shia aruba osang sangdongtsüla. Asenoki tejashi madak takok anguba teimla mera agidi aser longjemer Tsüngremer yimli sangdongdi," ta ayongzüka liasü.

Yoido Full Gospel Church nungi Rev. Lee Young-hoon-i, "Gwanghwamun Square nung temeshi procession agiba ajanga alima sangwatsütsüa teimla tesangwa yadaksütsü ta ni amanger. Tasü nungi shia aruba Yisu Khrista temeim aser taochiji rara nung alirtem aser timtemertem den lemsatepsüla," ta ashi.

Presbyterian Church of

Korea (Hapdong) General Assembly nung Moderator, Rev. Jang Bong-saeng-i, "Tejakleni maoba putu ka nung iba temeshi procession ajanga tanela asentenshi milak tulu jangrutsüsa milak adokdaksütsü ta ni amanger," ta ashi.

Seoul Mayor, Oh Se-hoon-i, "Iba sentong ajanga telongjem adokdaksütsü aser telemsa den rara nungi kati ka aniteta teimla lenmang nung jajatsü, ta ni amanger," ta ashi.

Mayor-isa, Yisu Khrista tasü nungi shia aruba osang ajanga timtem ajangshirtem nem tasütait tanela agütsütsü, ta ashi.

Kasa sentong nung Rep. Lee Yong-sun (Democratic Party of Korea), Rep. Yoon Sang-hyun (People Power Party), Tir office nung senior secretary Heo Eun-a aser Seoul Metropolitan Council nung lenir, Lee Sung-bae nungeria salem osang lemsatepa liasü.

Sentong tetenzüklen CTS Chairman Gam Kyung-cheol-i, "Easter Parade ya

denominations balala aser putu balala atema taküm aser temeim osang sangdongba benjungmong ka akümtsü. Iba ya alima nung Khristan sobaliba benjung ka kümdaksütsü atema asenoki inyaksü," ta metetdakja liasü.

Tesülen Yoido Full Gospel Church leniba nung Ozüng Süngden mesükba ka amer yimdong süa jaja liasü. Parnokisa Mosa-i Temerem Tzüyim sadangba, Yisu Khrista asoba, Cana yimdak kiyir benjung aser Kibuba Benjung agiba noksatem saya.

Kasa sentong nungsa Korea nung Khristan yimsü prokba aser missionary temi shisaliok aser medical service agütsüba den Khrista osangtajung sangdongba metetdakja liasü.

Sentong tembanga National Hymn Singing Movement-i "Kechiyong Pa taküm lir" ken aten aser aonung "Joyful Concert" kenten sentong agi. Iba sentong nungji BTOB, Billie aser The Calling Choir-i shilem agia liasü.

Pakistan nung SC-i Jaranwala nung tatalokba ken o tembangtsü tuyu

April 06, 2026: Pakistan nung Supreme Court (SC)-i trial court ka dang 2023 küm Jaranwala nung Khristantem amakba ken o nung aibelenertem anema ken o benoka alibaji taruba ita 6 tsüngda tembangtsüla, ta tetuyuba agütsü.

Chief Justice of Pakistan, Yahya Afridi-i aniba bench kati police danga, iba ken o nung melung melemi alirtem aser jenshia senzürtem ajak tangsa aputsüla, ta tuyuogo.

Punjab Province sorkari iba ken o nung bail nung chioka alirtem indang bail ji thinenttsütsüla, ta mepishia benokba ken o angadangba mapang nung SC-i item tetuyuba agütsü.

2023 küm August 16 nü Faisalabad District kübok Jaranwala nung Khristantem amakba anema ken o 22

benoka lir. Anogo ishika tejaklen ken o anga tenzüka mapang nung Punjab Additional Prosecutor General Ahmad Raza Gilani-i, iba ken o ya tekeraba nung tembangtsü nüngdak, kechiyong Faisalabad nung aliba special anti-terrorism court ka nung item ken o mapang talangka anendaka lir, ta metetdakja liasü.

Provincial sorkar legal team-i court dang item ken o tembangtsü atema mapang atakteta züngzüksütsüla, ta mepishi.

Iba sülen Supreme Court bench-i, item ken o ajakji taruba ita 6 tsüngda tembangtsüla, ta tuyuba den külemi Punjab Police inspector general danga jenshia senzürtem ajak tangsa aputsüla, ta tuyuogo.

2023 küm August ita nungji

ANOGO ABEN TSÜNGREM DEN

Maongka Halleluya

Tenüngsang Ken 105 nung Israel nunger otsü ashir aser ken züluri yimya nung anguba ama otsü nung Tsüngrem tsüngnep angu, ibaya Halleluya agi atem. Ibai Tsüngremi Abraham dang nangzük, Isak dang azüngashi aser Yakob den akangshi. Parnok yongsük ishika dang aliba mapang Tsüngremi parnok kümsük. Parnok azükarua alidang parnoki Tsüngrem ozüng amatok.

Pai linük nung yawara adokdaksü. Tsüngremi Yosef Ijipi yok aser Pa nübür anitetsü Mosa yok. Tsüngremi parnok dangi amang yok aser tzü azü kümdaksü. Parnok akhümbangtsü Tsüngremi mepet yok aser sangwadaksütsü mi yok. Tsüngremi lung jakmatsü aser parnok nem tzü agütsü. Ken züluri ibai meyipa repringba Halleluya agi shibang.

Kari maongka dang nungi yimya nung Tsüngrem temelaba angur. Yakobi rem, süngdong aser petinutem atema Tsüngrem tenüng asang saka kodang Yosef anir ao pai ashi, "Item ajak ya Pa anema lir." Mapang kar nung ken züluri "Halleluyah" ta Tsüngrem tenüng asangtsü mejangra. "O kü nela, nai kechiba tim atemer? Kechiba kü mulung nung na jashir? Tsüngrem dak yimlaang: kechiaser ni pa tanaben asangtsü, kü teyari aser kü Tsüngrem" (T.Ken 42:5).

Tsüngrem meimertem asoshi mapa ajak tajung asoshi inyaker, anungji Khristan kati Tsüngrem tenüng masangtsü kecha temeten mali. Ammang nung Tsüngrem tenüng sangang kechiaser Pai sangwatsür. Tejashi asoshi Tsüngrem tenüng sangang kechiaser Yisui ashi, "Ne tejashi tepela agi melentsü." Mepet asoshi Tsüngrem tenüng sangang kechiaser mepet manung Pai temeim tongnügen yoker. Mopung asoshi Tsüngrem tenüng sangang kechiaser iba nung nisung chiri ne den jajanür. Shibai ozüng nung tashi angar, "Kibuba nung pelaang," Pa tanela nung anüngdang aser aonung minute shia pa/la mulung nung Halleluya lir.

Muslim nunger telok aikati Tenla kitem aser Khristantem meyong kiojen aika rongdokja liasü.

2024 küm February ita nung taoba mapang Chief Justice Qazi Faez Isa leniba nung bench kati, iba ken o nung terenlok kecha maliba atema Punjab sorkar merenshia liasü.

Jaranwala nung Khristan adianu anati Muslim nunger temeshi kaket Quran raksatsü aser ainkar Muhammad mezüngmeshi, ta tena nem tai tongloktsüba sülen Muslim nungertemi Khristantem anema apusoa liasü, ajisüaka ibaji tiyazü nung tai tongloktsüba liasü ta tesülen jangaogo.

Muslim nungertemi Tenla ki trok den Khristantem kiojen amakba sülen ghonda 24 tsüngda police-i Muslim nung 100 dak tema pua liasü.

Faisalabad district nung aliba mosque ka nungi sangdong ka agütsüba sülen Muslim nunger lokti jagi Basti Maharawala kiyong nung Presbyterian Tenla ki asem, Catholic Arogo Tenla ki ka, Full Gospel Assembly Church Tenla ki ka aser Salvation Army Tenla ki ka raksaja liasü.

Amnesty International-i ashiba agi, Khristantem amakba nungji nisung 5,200-i shilem agia liasü, ajisüaka 380 dang pua liasü.

"Temelung melemi apuba nisung 380 nungjagi parnok 228 bail nung chiok aser nisung 77 bo maitsüi chiokogo," ta parnokisa metetdaksü.

Tang alima nung Khristantem alitsü linük tamajungtiba 50 rongnung Pakistan ya jenjang 8buba nung lir (Open Doors 2026 World Watch List).

AO OSHI ANGAZÜKDAK:

TANÜ ANGAZÜKTSÜBA OJANG



Waro

(n) Süpeti nung noksa kuma takokba ayak (a design in women traditional wear)

* Waro enoka atakba süpeti jenjang kanga tasak kumogo.

Warochi

(n) shi mesüra ango asoba aontsü mekonger telong akümba, süngdong kar nunga iba ya alir (semi frozen non-veg soup, gummy substance)

*Nibo warochi ya kanga chinür. Au telong nung warochi dena liasü.

OLONG PAITEP # 7466

1		2		3		4
		5		6		7
8						
		9				
	10					
					11	12
		13			14	
15				16		

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüingsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. ___ adenshi - (4)
- 14. Tsünüsenbongtsü adokdak - (3)

OLONG PAITEP # 7465 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

NAI-A YA METETTER



April 4, 2026 nü Ukrainian Bulava drone unit nungi Roman "Hulk" ta ser pilot kati 500 kilometers nungi Russian Shahed-type loitering munitions ana raksatsüogo. Roman "Hulk"-i STING interceptor drone amshia meta talangka pilar air targets ana bushiteta raksatsü aser iba ya tang mezüng atema inyaktetba otsü ka lir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Assam Police & Central Forces-i Dhubri nung area domination march agi



Guwahati, April 6, 2026

(Agencies): Assam Police-i central paramilitary forces den külemi Dhubri jila nung pre-election security exercise agiogo.

Assembly elections agitsü aliba jakdang law & order tiptema ayutsü aser voter tem tasü itdaksütsü atema iba mapa inyakogo.

Iba mapang parnoki jila nung tesem balala sema senzü aser "Nirvoyere Ami Agbari Aho Abhilekh Vote Danere Asom'r Sunam Goru" züluba banners sayua liasü.

Parnoki voter tem dang election nung tetsübu melii shilem agitsü tayongzükba agütsü.

Iba sentong ya Dhubri

Superintendent of Police Debashish Borah lenisüba kübok agi aser law enforcement personnel aikati shilem agi.

District police dak alia paramilitary units balala nungi company commandants teneti shilem agia liasü. Parnok rongnung Border Security Force (BSF), Central Reserve Police Force (CRPF), aser Jharkhand Armed Police (JAP) dena liasü.

Golakganj aser Bilasipara amala tesemtem den külemi Dhubri nung iba mapa inyakogo ta SP Borah-i ashi.

Iba ya state ajungalen sentong ka liasü aser tanü nikongdang 3 nungi 4 ako tashi agi. Lendong ataloktsü ana nung aliba tesemtem nung tensa azüoktsü aser public temlung uludaksütsü atema iba sentong agiogo ta Borah-isa shisem.

Rabha National Council-i Congress candidate pusema nungiter

Guwahati, April 6, 2026

(Agencies): Rabha nunger tongti telok Rabha National Council (RNC)-i BJP teloktep den madentsü aser Congress candidate Ramen Singh Rabha yaritsü ta telemtetba agiogo.

Boko-Chaygaon constituency nung RNC-i Ramen Singh Rabha yaritsü ta lemtetba ajanga BJP-i aniba teloktep atema tetsükdaksü bentsür aruogo.

April 4 aonung tesü RNC Chief Secretary Govinda Rabha, Central Member & Auditor Aditya Rabha, Borduwa-Bholagaon Regional Committee Executive President Arun Diya, Kamrup District Member Manoj Rabha, aser Ribhoi District President Pradip Rabha nungeri

osangbener den jembiba iba osang metetdaksü.

Rabha Joutho Mancha nung züngsem kari political tsütsü koda masüba agi BJP candidate Raju Mech den yariteper saka parnok temulungjangbo Ramen Singh Rabha den lir. Pa ya Rabha nunger asoshi "national leader" lir anungji Rabha nungeri Congress candidate yarotsü ayongzükter ta RNC-i ashi.

Ramen Singh Rabha-i All Rabha Students' Union (ARSU) nung president anaben aser general secretary inyakogo. Pai mapang talangka Rabha nunger asoshi inyaka arur. Iba constituency ya Scheduled Tribes atema melemezüktsü asübo BJP

candidate Raju Mech-i shilem magitetla ta RNC tanishirtemisa ashi.

United Bodo People's Organization (UBPO)-i yaküm Rabha Hasong Autonomous Council nung Bodo-majority villages 312 züngdoktsü lemtetba nung Mech-i pusema nungitet. BTAD region nung aliba Rabha nungeri iba lemtet magizük ta parnokisa metetdaksü.

Ramen Singh Rabha-i Ukiam nung Kulshi ayong nung tzünokdang yanglutsüba, Rabha Hasong nung planned satellite township aser nijatem nem Dorabil land agütsütsüba anema noktakogo anungji nübertemi pa nem vote enoktsütsü mepishir ta RNC-isa ashi.





TRANSFORM YOUR DIET WITH THE 5 Ps!

1  **PLENTRY** of fruits, vegetables & water

2  **PICK** healthy fats

3  **POWER** your plate with balanced nutrition

4  **PLAN** your mealtimes mindfully

5  **PAY** attention to portions & food choices

#StopObesity

Follow us: 

State Food Safety Authority,
Department of Health and Family Welfare, Govt. of Nagaland.



Remember the past.
Celebrate the present, Grow the future.

You are cordially invited to join us as
The Ao Baptist Fellowship Kohima Science College Campus, Jotsoma
celebrates 50 years of God's unfailing faithfulness. Sunday, 12th April, 2026 at 11:00 am
Venue: Ao Baptist Fellowship Kohima Science College Campus, Jotsoma.

US aser Iran yimjung sentong asadanger

Dubai, Rongchii/April 06 (Agencies): United States-i mapang züngzüksüba tonga arudang United States aser Iran nati hopta pongu rara atemtsü asoshi sentong ka indang framework nguogo, ajisüaka Tehran-i Strait of Hormuz tanaben lapoktsü tangbo mera magitsü ta ashir.

Alima nung energy supplies asoshi tongtipang tzu lenman nung rong tem senzütsüsa Tehran-i Mongulbarnü atemndang tezüngzüktep ka meyaglura tzunglu ama molumi yoktsü ta US Tir Donald Trump-i amokmerena lir.

Pakistan tetsüngtai ia yangluba sentong ya ammanng agi sangwa kuma osang agitepba nungi adok aser yangji tangsa ceasefire alitsü aser iba sülen anogo 15 nungi 20 tsüngta tembangsüsa jembishinü akatsü shia lir ta ashir.

Pakistan army tekolakba Field Marshal Asim Munir-i US Vice President JD Vance, special envoy Steve Witkoff aser Iranian Foreign Minister Abbas Araqchi nung den ammanng tepiyong jembia liasü, ta osang ajanga ashi.

Iran indang foreign ministry ajanga Hombarnü ashiba agi, ceasefire proposals nung telanzüba agüja Tehran-i taginüba yangluogo aser tejangraba nung amendaker takhangba tem tetsüngtai aiter ajanga agütsüogo.

Ministry odongtar Esmail Baghaei-i ashiba agi, telanzüba ya mapang tetemsü nung sangdongtsü saka jembishinüba ya takhangba agütsüba aser war crimes inyaktsü amokmerena den mapeter.

"Iran-i tim meshir ta bilemba aser angatetba jangja-jangja lemsatsü nungnanga mali aser yamaji inyakba ya atsüanem akaba ama mangatetsüla, saka ozü tamendak dak wazüka ayuba nung temulung lemtetba sayur," ta Baghaei-i osangbener senden ka nung ashi. Paisa taoba mapang US-i akhangba 15-point plan ya tera tali asüba yong magizük ta pai ashi.

Hombarnü Iran ketdangsür kati osangbener dang ashiba agi, Iran-i temporary ceasefire nung shilem ka ama Strait tanaben melapoktsü mesüra mapang züngzüksüba mesüra tezüngzüktep ka yanglutsü ajungshiba magizüksü. Washington teti atema ceasefire asoshi renema mali, ta ketdangsüri ashi.

US, Iran aser regional mediators tem phase ana deal nung shilem ka ama anogo 45 ceasefire alitsü atema jembishinür aser iba sülen teti atema rara tatembang kati arutsü sentong lir ta

Deobarnü Axios ajanga mezüng sangdonga liasü.

Trump-i Deobarnü pa indang Truth Social sapang nung, Iran-i deal ka meyaglura aser Strait ya Mongulbarnü tashinung tanaben melapokra Iranian energy aser transport infrastructure ano amaktsü ta amokmerena liasü.

Deobarnüsa ano pai kasa sapang nung, "Mongulbar nikongdag 8:00PM Eastern Time! (Bodhbarnü 0000 GMT)" ta tejangjaba nung mapang züngzüksü.

Kechi komala tangatetep südir süaka Strait of Hormuz amshitsütsüsa yanglutsüla, ta United Arab Emirates (UAE) tir nem shisa agütsür Anwar Gargash-i ashi. Iran indang nuclear sentong aser par missiles aser drones maziuki tezüngzüktep yanglura Middle East nung tensa tamajungba atema lenmanng lapoktsütsü, ta pai ashi.

Hombarnü region tesem balala nung anünglen nungi amakba osang lir, koba hopta pongu shi jakdang US aser Israel nati lungjemer Iran maka tenzük, kong nisung meyririjang aika tepsetogo aser alima rongsenketzüng kanga mejungi kumdaktsür lir.

Iranian state media-i par Revolutionary Guards indang intelligence organization tekolakba Majid Khademi süogo ta sangdong. Hombarnü Israel-i Khademi tepsetba tenüng agia liasü.

February 28 nü iba rara tenzük Israel aser US nati Iran nung lenirtem aika tepseta arur aser item rongnung Supreme Leader Ayatollah Ali Khamenei densema lir, shiba par jabaso Mojtaba-i melenzük.

Ano US aser Israel nati Tehran nung Sharif University of Technology indang data centre ka maka linük indang artificial intelligence platform aser danga services meyririjang aika nung kongshio, ta Fars News Agency ajanga Deobarnü ashi.

Hombarnü Israel indang Defence Minister Israel Katz-i sangdong ka agütsüba nung Iran indang ki o jen raksatsütsü aser par lenir ka khen ka bushia tepsettsü amokmerena liasü.

Trump-i power plants aser apu tem densema civilian infrastructure amaktsü akok ta Iran aiben amokmerena arur.

Mongin temi iba amaji makra war crimes asütsü ta ashir, saka International Criminal Court tashi mali, kechiaser item linüktem ya court nung züngsem masü.

Geneva Conventions ajanga rara nung densema alirtemi "civilian objects aser military objec-

tives" bendangtsüla aser civilian objects nung amaktsü memelar ta ashir.

Iba rara tenzük Israel nung nisung 3,540 shi tepsetogo aser yangji tanur 244 lir ta US nung aliba rights group HRANA ajanga ashir.

Deobar aonung missile amshia Israel north tsütsü Haifa nung nisung aliba ki ka amakba mapang Israel nung pezü tepset, ta ashir, anungji Iran aser Hezbollah nati iba rara nung Israel nung civilian tepsetba 23 ajunger.

US sepai 13 takum samaogo aser noklang aika yirua lir.

Myanmar tir tasenba Hlaing anema Indonesia nung ken o benok

Jakarta, Rongchii/April 6 (Agencies): Tawa shimba Myanmar tir Min Aung Hlaing anema Indonesia nung Hombarnü lokti tentet kari criminal case ka benokogo. Rohingya nung samatsütsü merangba atema parnoki tir ya aija liasü.

Myanmar ya Association of South East Asian Nations (ASEAN) züngsem ka lir, saka Min Aung Hlaing-i anir 2021 küm military-i civilian sorkar atsüngba sülen tesendaktep mejungi kümogo, aser iba ajanga linük nung civil war tenzükdaktsü aser Rohingya Muslim nungertem aika pei talidak toktsür jenshia oa refugee camp tem nung alitsüsa kumdaktsüogo.

Ukraine-i linük anüolen tesem kar meyipa agiogo

Kyiv, Rongchii/April 6 (Agencies): Ukraine-i January tatem len nungi tang tashi nung linük anütoktip aser anütoklen litsü sq. km 480 meyipa agiogo, ta army tekolakba Oleksandr Syrskyi-i ashiba den, Russia-i maneni tesem balala nung tejkadangi aotsü merangdar, ta shisem.

Raraba tesem semdangba sülen Syrskyi-i ashiba agi, Ukraine-i anütoklen Dnipropetrovsk temeket nung tesem ti aser anütoktiplen Zaporizhzhia temeket nung tesem pezü meyipa agiogo.

Ukraine-i item tesemtem nung takok tajung ngua oaka Russia nung sepaitemi maneni tejkadangi aotsü meranga raradar, ta pai ashi.

"Russia nung sepaitemi parnok sentongtem metoktsü lir aser maneni raratsü atema tanungba sepaitem anidenba den parnok ket nung aliba hadirtem bendendar," ta Syrskyi-

Indonesia kong ASEAN indang headquarters amenoka lir, iba linük ya alima nung Muslim nungertem timba aliba linük lir, aser Myanmar nungi jena aoba mesüra refugee camp tem nungi rong nung jena aoba Rohingya nungertem iba linük yagi aika aoe.

Junta tekolakba Min Aung Hlaing lenisüba nung Myanmar indang armed force temi 2017 küm Rohingya nung anema jenjang agiba sülen Rohingya nung 730,000 shi kidanger Bangladesh-i jena aotsüsa aküm, kong parnok timtem tekangshi aika ajangshia arudar.

Indonesia indang Attorney General office nem tashishiba ya Myanmar nungi jena aoba Rohingya nung Yasmin Ullah

aser taoba mapang attorney general aser Muhammadiyah mendenbuba densema Indonesia nung tongtibang nisungtem aikati agüja liasü, ta parnoki Hombarnü ashi.

Parnokisa, parnoki Rohingya nung minshiba kuli aser junta-i parnok tepsetba kuli agütsütsü ta ashiba den, ken o ya Indonesia nung prosecutor temi agizükogo, ta shisem.

Rohingya nung samatsütsü merangba atema aitsüba ya Myanmar-i magizüki arudar. Army-i teyari agütsüba party-i December aser January ita election agiba akokba sülen Min Aung Hlaing ya taoba hopta parliament nung vote agiba sülen tir asütsü shimogo.

Mulungnen



Wb. Tentiyoungdang Aier
(Mopungchuket)
11.11.1939 – 05.03.2026

Onoki teti meima aliba kinungbo aser tebu tajungi onok toktsur or mangyim tejashi aser terongjen nung aliba mapang nung kija, kibong, Arogo aser lokti tentet balala nungi shisatsü, nübu, mapang, rongsen aser sarasadem talubosa agüja ozü asükhu lemsatepba ajanga ozü mulungjang anisüngzuka süneptsüogo.

Nenek ajak dangi ozü mulungjang taroktiba nungi Tsüngremi nenok mapa tajung atema moshia moajangma.

Temeim Kinüngtsü, Chirnurtem,
Sosemdang-semtem

koba tongtibang logistics hub ka lir, ta Russia defence ministry-i taoba hopta ashiba state media sangdong ka ajanga metetdaktsü.

Russia-i Donetsk tesem ajunga azüoktsü merangba mapang Pokrovsk temeket nung rara ya 2024 küm tom nungi rara arudar.

Syrskyi-isa, pai Pokrovsk tesem semdangogo aser iba tesem nung aliba Ukraine nung sepaitem tashi itshidaktsütsü atema injang aser tanga tenüngdakba osettem talila yoktsü tetuyuba agütsüogo, ta ashi.

Rara anendaktsütsü atema sensaksem bangdaker aliba mapang Ukraine-i, tawa Russia indang totzü infrastructure balala tali maka arudar. Taoba hopta ana tsüngda Ukraine nung sepaitemi Russia kübok Baltic tzyüim nung rongnendak aser Leningrad tesem nung totzü infrastructure tem makogo.

Man City captain Silva-i season tembangba sülen club toktsütsü



Rongchii/April 6, 2026 (Agencies): Manchester City captain Bernardo Silva season tembangba sülen club toktsütsü, ta assistant manager Pep Lijnders-i jangjatsüogo.

"Otsü tajung ajak tatembang ka dangi arur," ta Deobarnü FA Cup quarterfinal nung Liverpool pur goal 4-0 agi akokba sülen Lijnders-i osangbenertem dang ashi.

"Pa tatembangbuba ita jangradema asayatsü - Hopta trok dang anunga lir - aser tepila sentong tajung ka agitsü imlar. Pa tushitsü langa lir," ta paisa shisem.

Arishi kum 31 tain Portugal nung international asayar, shibai City nungi kum teku asayaba mapang Premier League title trok aser Champions League-a kokogo,

pa contract tembangba sülen free agent ka ama club toktsütsü.

Pep Guardiola-i taoba mapang Silva ya melentsü makok ta shiogo.

Silva ya 2017 kum AS Monaco nungi USD million 57.35 shi agi City nung aden aser iba sülen pa club tenung nungi 450 ben asayaogo.

Pa ya tasa tajung amshia asayaba aser anibelem mesasai asayaba atema kanga nungtugu lir aser pa Guardiola kubok City nung kanga tongtibang asayar ka lir.

Taoba ita League Cup akokba sülen 2025-26 campaign tatembangbuba hoptai ayaoka aiba mapang City pur maneni domestic asaya nung asayamung asemprongla akoktsü timla mesamai lir. PL

nung parnoki temaba jenjang nung aliba Arsenal pur point teku agi memenepe lir.

Asernal pur meneptsü atema City ket nung asaya ti anunga lir.

Premier League nung temaba jenjang nung aliba club pezü nungi tongtibang asayartemi club toktsüba nung Silva ya Liverpool nung asayar Mohamed Salah sülen tanabuba asayar asütsü. Salah-i pai May ita club toktsütsü ta shiogo.

Arishi kum 33 tain Egypt nung asayar yagi iba osang ya taoba ita social media nung video ka ajanga lemsatapa liasü.

"Tejashitsüka mapang tonga aruogo. Iba ya kü indang farewell mezüngbuba shilem lir. Ni season tembangba sülen club toktsütsü," ta Salah-i ashi.

Salah ya 2017 kum AS Roma nungi Liverpool nung aden aser pa ya club puti otsü nung asayar tajungtiba ka kumogo. Club nungi asayaba mapang pai Premier League ana, Champions League, FIFA Club World Cup, UEFA Super Cup, FA Cup aser League Cup ana aser FA Community Shield ka kokogo.

Pai asaya 435 nung goal 255 idaktsü aser iba ajanga pa ya club nungi goal timtiba idaktsüba asayar tasembuba kumogo. Paisa, Premier League Golden Boot pezüben tashi agizükogo.

Pakistan team India nung SAFF Women's Championship masayatsü

Rongchii/April 6, 2026 (Agencies): Pakistan tetsür football team taruba SAFF Women's Championship nung asayatsü renema lir.

Linük ana tsüngda yimden yimsüsüba tsütsü mangatettep adoker aliba ajanga iba telemetba ya agiogo, ta Times of India-i metetdaksü. Asayamung nung team trok asayatsü.

South Asian Football Confederation-i taoba mapang, züngsem tenetpronglai iba asayamung nung shilem agitsü ta shir liasü, koba South Asia nung tetsür football asayamung tongtibangtiba ka lir.

Ajisüaka osang ajanga ashiba agi, asayamung nung shilem agitsü atema osang agütsütsü atema March 30 nü ya tatembangbuba anogo liasü, saka iba anogo süiaka Pakistan team-i iba asayamung nung shilem agitsü osang kecha agüja mali.

"Pakistan shilem magitsü. Official osangbo magütsü, saka atakzükja aliba anogo süiogo. Pakistan sorkari par team India-i meyokner ama reprangteter," ta ketdangsür tejen kati Times of India dang ashi.

SAFF

Women's

Championship ya Goa nung May 25 nungi June 7 tashi asayatsü renema lir.

India aser Pakistan na saisabong nung tesendaktep kanga mejungi kumogo aser cricket asaya nungbo asayartem salem dena masür.

Taküm SAFF Championship nung team trok asayatsü, kong India aser Bangladesh na densema lir. Team ana ya AFC Women's Asian Cup nung shilem agiogo.

Iba asayamung asayatsü atema Nepal-a tera agi dang qualify mesütet. Uzbekistan den penalty shootout asaya makokba sülen parnok tsük, saka Uzbekistan team bo quarterfinal tonga asaya liasü.

Tanga team temji Sri Lanka, Maldives aser Bhutan lir aser parnoki iba asayamung asayatsü ta osang agütsüogo.

SAFF Women's Championship puti otsü nung India-i takok tajungba ngua lir, aser parnoki iba asayamung ponguben kokogo aser Bangladesh-a kanga kara renloka odar, shirnoki taoba asayamung anabo kokogo. 2024 kum parnoki Dasharath Stadium, Kathmandu nung final asaya nung Nepal goal 2-1 agi koka liasü.

Sen, Sindhu nati anir India nung Asian Championships asayatsü



Rongchii/April 6, 2026 (Agencies): Lakshya Sen aser PV Sindhu nati anir India nung badminton asayartem Badminton Asia Championships asayatsü, ajisüaka Satwiksairaj Rankireddy aser Chirag Shetty nabo iba asayamung nung masayatetsü, kechiyong Rankireddy tapu yirur lir.

"Satwik tapu nung maneni tashiba lir, anungji tena iba hopta masayatsü," ta coach Tan Kim Her-i ashi. Satwik aser Chirag nati iba asayamung ya 2023 kum kokogo.

Tena ya Swiss Open nunga quarterfinal asaya nungi atsüngintsüsa aküm, kechiyong Satwik tapu tachichilen timtem adoka liasü.

Iba asayamung tebur kija asaya nung India nung rognungi Dinesh Khanna-i dang 1965 kum gold medal ngua lir, saka Lakshya-i tawa kanga

junga asaya arudar asünung pa dak iba asayamung akoktsü tamang akar. Pa mezüngbuba asaya Hong Kong nung Lee Cheuk-Yiu den asayatsü.

Kasa mapang nung Sindhu iba asayamung nung mezüngbuba asaya Malaysia tsür Wong Ling Ching den asayatsü.

Tebur kija asaya nung HS Prannoy qualifier ka den asayatsü aser Kidambi Srikanth Singapore nung eighth seed asayar Loh Kean Yew den asayatsü.

US Open champion Ayush Shetty China nung fifth seed Li Shi Feng den asayatsü.

Tetsür kija asaya nung Unnati Hooda Thailand tsür Supanida Katethong den, Tanvi Sharma Malaysia tsür K. Letshanaa aser Malvika Bansod Thailand tsür Busanan Ongbamrunphan den asayatsü.

Tebur tarep asaya nung Hariharan Amsakarunan aser M R Arjun na South Korea nung top seeds Kim Won Ho aser Seo Seung Jae na den asayatsü.

P. Krishnamurthy Roy aser Sai Pratheek K nata Japan nung Kakeru Kumagai aser Hiroki Nishi na den asayatsü.

Tetsür tarep asaya nung Ashwini Bhat K. aser Shikha Gautam na Thailand tsür Hathaithip Mijad aser N. Tungkasatan, na den aser Treesa Jolly o Gayatri Gopichand Pullela na China tsür Luo Yi aser Wang Ting Ge na den asayatsü.

Priya Konjengbam aser Shruti Mishra na qualifier ka den asayatsü

Tarep temeyoktep asaya nung Rohan Kapoor aser Gadde Ruthvika Shivani na Malaysia nung eighth seed Goh Soon Huat aser Lai Shevon Jemie na den asayatsü, Ashith Surya aser Amrutha Pramuthesh nata Malaysia nung tarep Wong Tien Ci aser Lim Chiew Sien na den aser Dhruv Kapila aser Tanisha Crasto na Thailand nung P. Horbanluekit aser Benyapa Aimsaard na den asayatsü.

Samson aser Bumrah na ICC Player of the Month atema nominate süogo

Rongchii/April 6, 2026 (Agencies): T20 World Cup takok ngua asayaba mapang tongtibang shilem agiba sülen Sanju Samson aser Jasprit Bumrah na March ita atema ICC Men's Player of the Month award asoshi nominate süogo.

Tena den South Africa nung batter Connor Esterhuizen-a nominate süogo, shibai March ita bilateral series ka nunga kanga junga asayaogo.

2026 T20 World Cup koka asayaba mapang Sanju Samson-i team-i pa kanga nüngdaka aliba mapang kanga junga asayateta team takok dangi ania liasü. Asaya karbo pai kijai koktsü ama asayatetogo.

Super Eights nung asayaba mapang Samson-i kechi südir süiaka akoktsüba asaya ka nung run 97 yanglu aser iba sülen semifinal nung run 89 aser final nunga run 89 yanglu liasü. Pai tongtibang asaya asem nung run 275 yanglu. Pa indang average ji 137.50 aser strike rate 200 jungnüa liasü aser pa iba ajanga nem Player of the Tournament

naroküm agütsü.

Kasa mapang nung India nung pace bowler Jasprit Bumrah-ia iba asayamung nung kanga junga asayaogo. Run aika yanglua asayaba semifinal asaya nung Bumrah-i ball kanga junga aonba ajanga India team jenjang junga kumdaktsü. Iba sülen pai final nunga run 15 dang agütsür wicket pezü agia team asoshi tongtibang shilem agi, aser iba atema pa nem Player of the Match naroküm agütsü.

T20 WC nung tatembangbuba asaya asem nung Bumrah-i wicket tenet agia liasü.

Maneni nominee rongnung tasembuba South Africa nung batter Connor Esterhuizen-i, New Zealand den T20 asayamung ka asayaba mapang kanga junga asayaogo. Pai asaya pongu nung run 200 yanglu, kong decider nung out mesüi run 75 yangluba densema lir.

Iba asayamung nung pai Player of the Match naroküm anaben tashi agizük aser pa ICC rankings nung kanga kara tejakdangi tudar.

BILEMDANGANG

"Tangari kechi ashir aji tanga, saka parnoki kechi inyaker aji repranga ata-ang."